

«Կանայք տնօրենների խորհրդում»

Վերապատրաստման անցկացման պայմանները

- 1.1. Վերապատրաստումը նպատակ է հետապնդում խթանել հայաստանյան կազմակերպությունների տնօրենների խորհրդում կին անդամների ներկայացվածությունը:
- 1.2. Անկախ Վերապատրաստման նպատակից՝ դրանում խրախուսվում է նաև տղամարդկանց մասնակցությունը:

2. Վերապատրաստման հասցեատերերի շրջանակը

- 2.1. Վերապատրաստման հիմնական հասցեատերերն են՝
 - 2.1.1. խորհրդի գործող անդամները, ովքեր ցանկանում են արդիականացնել իրենց գիտելիքները խորհրդի գործունեության և կորպորատիվ կառավարման ժամանակակից միտումների ու գործիքակազմի վերաբերյալ,
 - 2.1.2. գործադիր թիմի ղեկավար անդամները և կորպորատիվ կառավարման պատասխանատուները (կորպորատիվ քարտուղարներ, ներքին աուդիտորներ, ռիսկերի կառավարման, համապատասխանության պատասխանատուներ, բիզնես խորհրդատուներ և այլք), ովքեր իրենց հետագա աճը տեսնում են խորհրդի անդամի կարգավիճակում,
 - 2.1.3. բիզնեսի սեփականատերերը, ովքեր նպատակ ունեն իրենց կազմակերպություններում ձևավորել խորհուրդ կամ բարելավել գործող խորհրդի գործունեությունը,
 - 2.1.4. պետական իրավասու այն մարմինների աշխատակիցները, որոնք նպատակ ունեն խթանել կորպորատիվ կառավարման միջավայրի զարգացումը Հայաստանում,
 - 2.1.5. կորպորատիվ կառավարման հիմնախնդիրներով հետաքրքրված անձինք, որոնց տեսակարար կշիռը չի կարող գերազանցել Վերապատրաստման մասնակիցների ընդհանուր թվի 10%-ը:

3. Վերապատրաստման մասնակիցներին ներկայացվող պահանջները

- 3.1. Վերապատրաստման մասնակիցը պետք է լինի Վերապատրաստման հասցեատեր և ունենա՝
 - 3.1.1. բարձրագույն կրթություն և առնվազն հինգ տարվա մասնագիտական աշխատանքային փորձառություն,
 - 3.1.2. LinkedIn սոցիալական ցանցում հասանելի օգտահաշիվ:

- 3.2. Մասնագիտական աշխատանքային փորձառության պահանջ կարող է չկիրառվել միայն բակալավրիատի և մագիստրատուրայի ավարտական կուրսերում սովորող ուսանողների նկատմամբ, ովքեր հետաքրքրված են կորպորատիվ կառավարման հիմնախնդիրներով:

4. Վերապատրաստմանը դիմելու կարգը

- 4.1. Վերապատրաստմանը մասնակցելու հայտադիմումը ներկայացվում է Կենտրոնի համացանցային էջի միջոցով մինչև ս.թ. նոյեմբերի 7-ը, ժամը՝ 18:00:
- 4.2. Վերջնաժամկետի ավարտից հետո ստացված հայտադիմումները չեն դիտարկվում:
- 4.3. Հայտադիմումին կից ներկայացվում են՝
- 4.3.1. հետաքրքրվածության նամակ, որտեղ պետք է հիմնավորվի Վերապատրաստմանը մասնակցելու շահագրգռվածությունը և նշվի ձեռք բերված գիտելիքների պրակտիկ կիրառման հնարավորությունը,
- 4.3.2. առնվազն մեկ երաշխավորագիր, որը պետք է ստորագրված լինի երաշխավորող անձի կողմից:
- 4.4. Հետաքրքրվածության նամակը և երաշխավորագիրը ներկայացվում են հայերեն՝ լուսապատճեն տարբերակով:

5. Վերապատրաստման անցկացման եղանակները

- 5.1. Վերապատրաստումն անցկացվում է դասավանդման հեռավար և առկա եղանակների համադրմամբ՝ ըստ հայտարարված ժամանակացույցի:

6. Ինքնուրույն աշխատանք

- 6.1. Վերապատրաստման շրջանակներում մասնակիցներին առաջադրվում է ինքնուրույն աշխատանք, որը նպատակ է հետապնդում մասնակիցների ջանքերով ներկայացնել կորպորատիվ կառավարման տարբեր հիմնախնդիրների էությունը և խրախուսել մասնակիցների միմյանցից սովորելու հնարավորությունները:
- 6.2. Կենտրոնը ներկայացնում է ինքնուրույն աշխատանքների թեմաների ոչ սպառիչ ցանկը և մասնակիցներին քաջալերում իրենց մասնագիտական հետաքրքրությունների շրջանակում ինքնուրույն աշխատանքների թեմաների ներկայացումը և մշակումը:
- 6.3. Ինքնուրույն աշխատանքները կարող են լինել ինչպես անհատական, այնպես էլ խմբային: Հաշվի առնելով Վերապատրաստման մասնակիցների միջև մասնագիտական կապերի և անձնական շփումների կայացման անհրաժեշտությունը՝ Կենտրոնը խրախուսում է խմբային աշխատանքները:

- 6.4. Եթե Վերապատրաստման մի քանի մասնակից ընտրում է նույն թեման, Կենտրոնն ապահովում է նրանց միջև կապի հաստատումը:
- 6.5. Հնարավորության դեպքում մասնակիցը կարող է խմբային աշխատանքին մասնակից դարձնել Վերապատրաստման նախորդ փուլերի շրջանավարտներին կամ «Հայ կանայք տնօրենների խորհրդում» ցանցի մասնակիցներին:
- 6.6. Ինքնուրույն աշխատանքի ծավալը չպետք է գերազանցի 500 բառը: Աշխատանքը պետք է լինի վերնագրված՝ հեղինակի (հեղինակների) անվան և ազգանվան նշումով, հղումներ ունենա օգտագործված գրականությանը, գրված լինի պարզ ու գրագետ հայերենով:
- 6.7. Ինքնուրույն աշխատանքը կարելի է ներկայացնել տեսահոլովակի ձևաչափով:

7. Եզրափակիչ քննություն

- 7.1. Վերապատրաստումը եզրափակվում է թեստային քննությամբ:
- 7.2. Եզրափակիչ քննությանը մասնակցելու հնարավորություն ունեն միայն այն անձինք, որոնք ակտիվորեն մասնակցել են Վերապատրաստման միջոցառումների առնվազն 60%-ին:
- 7.3. Եզրափակիչ քննությունն անցկացվում է միայն առկա եղանակով՝ ըստ հայտարարված ժամանակացույցի:
- 7.4. Եզրափակիչ քննության թեստային հարցերը մշակվում են Վերապատրաստման ձեռնարկների հիման վրա:
- 7.5. Թեստի հարցերի առնվազն 70%-ին ճիշտ պատասխանած մասնակցին շնորհվում է Վերապատրաստումը հաջողությամբ ավարտելու մասին հավաստագիր:
- 7.6. Թեստի ճիշտ պատասխանների նվազագույն շեմը չհավաքած մասնակցին տրվում է հավաստագիր Վերապատրաստմանը մասնակցելու մասին կամ թեստը վերահանձնելու հնարավորություն:
- 7.7. Թեստի վերահանձնումը հնարավոր է միայն մեկ անգամ:

8. Վերապատրաստման մասնակիցների պարտավորությունները

- 8.1. Վերապատրաստման մասնակիցները պարտավոր են՝
 - 8.1.1. ապահովել Կենտրոն ներկայացվող տվյալների և տեղեկությունների արժանահավատությունը,
 - 8.1.2. ակտիվորեն մասնակցել Վերապատրաստման շրջանակներում կազմակերպվող միջոցառումներին՝ անկախ դրանց հրավիրման եղանակից,

- 8.1.3. ժամանակին հաճախել Վերապատրաստման միջոցառումներին՝ հետևելով հայտարարված ժամանակացույցին,
- 8.1.4. հեռավար միջոցառումների ընթացքում տեսախցիկը պահել ակտիվ վիճակում, խոսափողը միացնել միայն դասընթացավարի կամ մասնակիցների հետ հաղորդակցվելիս,
- 8.1.5. սահմանված ժամկետներում ընտրել ինքնուրույն աշխատանքի թեմա, ինչպես նաև սահմանված ժամկետներում մշակել և ներկայացնել ինքնուրույն աշխատանքը, որը ենթակա է քննարկման Վերապատրաստման շրջանակներում հատուկ այդ նպատակով հրավիրվող նստաշրջանի ընթացքում,
- 8.1.6. արձագանքել և հաղորդակցվել Կենտրոնի պատասխանատուների հետ ինչպես գրավոր, այնպես էլ բանավոր եղանակով:
- 8.2. Անձինք, որոնք չեն մասնակցել Վերապատրաստման միջոցառումների 40 և ավելի տոկոսին, չեն թույլատրվում թեստային քննությանը: Նրանց չի շնորհվում որևէ հավաստագիր:

9. Կենտրոնի պարտավորությունները

- 9.1. Կենտրոնը պարտավոր է՝
 - 9.1.1. Վերապատրաստումը կազմակերպել և անցկացնել՝ ըստ հայտարարված ծրագրի և ժամանակացույցի,
 - 9.1.2. Վերապատրաստման ծրագրի, ժամանակացույցի, անցկացման եղանակի հնարավոր փոփոխությունների մասին ծանուցել մասնակիցներին առնվազն 7 աշխատանքային օր առաջ,
 - 9.1.3. ապահովել Վերապատրաստման մասնակիցների հաճախումների հաշվառումը,
 - 9.1.4. մասնակիցներին ժամանակին տրամադրել Վերապատրաստման նյութերը,
 - 9.1.5. սույն կարգով նախատեսված սահմանափակումները կիրառելու դեպքում ներկայացնել հիմնավոր փաստարկներ: